

Jonas

Wazà Mebpezumazuma si Jonas te NENGAZEN

1 ¹Ne zuen timpu he zutun, migkegiyan te NENGAZEN si Jonas he anak ni Amitai. Ke sikandin te, ²“Segugunè ka hendiyà te zekelà he inged he Nineve, ne kegiyi nu is menge etew zutun, he engkezi zan is mezaat he menge ulaula zan su sumalà is neehè ku, utew subra is kezaat te menge ulaula zan.” ³Piru wazà mebpezumazuma si Jonas su mibpeleguyan din is NENGAZEN pehendiyà te Tarshish. Midhendiyà sikandin te Jopa, ne zutun duen barku he edhendiyà te Tarshish. Mibayad sikandin te piliti, ne hein nekevayad en, mid-untud dutun te varku he ebpehendiyà te Tarshish su wey zin mepeleguyi is NENGAZEN.

⁴Ne hein dutun en te zagat, impepengeramag te NENGAZEN te utew mevandes, ne tenged te kevandes din henduen be te egkezeetan en haazà is barku. ⁵Ne tenged te utew nengahandek is menge terebahanti, ne is kada sevaha kandan mid-ampù diyà te kandin he menge ed-ezapan. Ne impenimbag dan en is menge karga zutun te varku su wey mebmahagkap.

Ne si Jonas mulà, nehurep diyà te zizalem he vahin te varku. ⁶Ne midhendiyà te kandin is kepitan dutun te varku. Ke sikandin te, “Maan is iyan nu zà is kedlizepeng nu? Enew ka, wey medhangyù diyà te kenikew he ed-ezapan. Su kela ke mehizuwi kiw zin ne kenè kiw zed egkegerà.”

⁷Ne mibpelelelagà is menge terebahanti zutun te varku, ne iyan neyunan dan he ibarè dan pinaagi te ripa ke hentei is edsilutan he iyan hinungdan he impepengeramag te utew mevandes. Ne zutun te kedripa zan iyan neripahan si Jonas. ⁸Ne zutun migkegiyan dan si Jonas te, “Maan is nehitavù heini is bagyu? Maan is kayi ka? Hendei ka ebpuun? Hengkey is ngazan te nasyun nu? Hengkey ka he kelasi te etew?” ⁹Ne ke si Jonas te, “Hebriyuhanen a ne iyan ed-ezapan ku is NENGAZEN, is Megbevayà diyà te langit he iyan midlimbag te zagat wey tanà.” ¹⁰Ne midtudtulan sikandan ni Jonas mehitenged te kenè din kebpezumdumahi te sugù te NENGAZEN kandin. Ne tenged dutun utew zan nengahandek, ne ke sikandan te, “Kenà meupiya haazà is mid-ulaula nu.”

¹¹Ne zutun mid-iseq en is kevandes te keramag, ne migkegiyan dan si Jonas te, “Hengkey is ed-ul-ulahan dey kenikew su wey meengked heini is utew zekelà he vagel su wey key kenà mekeizi?” ¹²Ne ke si Jonas te, “Itimbag a keniyu ziyà te zagat, ne egkeengked heini is mevandes he keramag, su tenged te salè ku ne neuwit-uwit kew.” ¹³Iyan, midhimu zan pa is taman te egkehimu zan. Midsigudu zan mebpemegsey su wey mekehendiyà te veyvey haazà is barku. Iyan, wazè dan nehimu su nasi en man medlavew is kevandes te keramag. ¹⁴Umbe, midhangyù dan diyà te NENGAZEN he ke sikandan te, “He NENGAZEN, kenè nu himuwa he mebpatey key tenged te kebpatey kayi te etew pinaagi te kedtimbaga zey kandin diyà te zagat. Kenè key kenikew siluti tenged te kegkehimetayi zey kandin, su heini is nehitavù, NENGAZEN, kenikew he ulaula su midhimu nu is egkesuatan nu.” ¹⁵Ne zutun mibitbit dan si Jonas ne intimbag dan diyà te zagat, ne segugunà mibmelinew is dagat. ¹⁶Ne tenged kayi he hitavù, dekelà is kedtahud te menge etew te NENGAZEN. Umbe mibpemuhat dan sikandin wey zuen menge penaad dan diyà te kandin.

¹⁷Ne zuen utew zekelà he isdà he integana te NENGAZEN su wey zìn meeveleng si Jonas, ne ziyè si Jonas te getek dutun te isdà seled te tetelu he andew wey tetelu he kezukileman.

Is Ampù ni Jonas

- 2** ¹Ne zutun te ziyè si Jonas te getek te isdà, mid-ampù sikandin diyà te NENGAZEN he Megbevayè din. ²Ke sikandin te, “NENGAZEN, edsempiten ku sikew tenged te kemeregenan he neegiyan ku.
Ne midineq a kenikew.
Ne midtevangen a kenikew hein edserupatey ad.
- ³Ne guntaan intimbag a kenikew kayi te mezalem, ne zini ad te zizalem te zagat.
Ne nelened a wey netembunan a te zekelà he menge vagel he midhimu nu.
- ⁴Minsan pa te impekeziyù a puun kenikew, netuenan ku he ebpekehendiyà a gihapun te segradu he valey nu.
- ⁵Inteledted ad te wahig ne henduen te egkelened ad.
Is ulu ku, nevukusan te sagbet diyà te zagat.
- ⁶Kunaan ku ke nepirisu ad diyà te kinezizeleman te wahig te wazà pidtemanan.
Piru inggaun a kenikew puun te kinezizeleman, He NENGAZEN he Megbevayè ku.
- ⁷Ne hein edserupatey ad, netenuzan ku sikew.
Ne zutun mid-ampù a, ne is ampù ku nezineq nu,

su nekeuma ziyà te kenikew zutun te segradu he valey nu, ne midtavak nu haazà.

⁸ Sikan is menge etew he iyan edsimbahan dan is duma he menge edzapen, ne mid-engkezan dan is gagew nu kandan.

⁹ Iyan, siak mulà, emun edlibriyen a kenikew ne ebpemuhaten ku sikew te kanta te kebpselamat.

Ne heini is impenaad ku, edtumanen ku.

Sikew is NENGAZEN, iyan ka ebpekelibri!”

¹⁰ Ne midsugù te NENGAZEN sikan is isdà he iutè din si Jonas diyà te veyvey, ne midtuman dutun te isdà haazà is insugù kandin.

Midhendiyà si Jonas te Nineve

3 ¹ Ne migkegiyan en maan te NENGAZEN si Jonas te, ² “Hendiyè kad human te zekelà he inged he Nineve, ne isangyew nu sikan is migkagi ku ziyà te kenikew.” ³ Ne human mebpszumazuma si Jonas, ne midhendiyà sikandin te Nineve. Ne is Nineve utew zekelà he inged; tetelu he andew is kedhipenawa zutun ne human ta egkepangkus.

⁴ Ne mibpuun medseled si Jonas dutun te inged, ne zutun te kebpun din senga andew is kedhipanew zin. Midweliyan din is menge etew ziyà te Nineve he ke sikandin te, “40 dā he andew is kelugayad ne edlimasen kew en te Megbevayà sumalà is migkagi zin kayi te kediey!”

⁵ Ne tenged dutun midtuu te Megbevayà is menge tig-Nineve. Mibpuasa sikandan, ne is langun kandan, dekelà se zeisey is pid-etawan din, ne mibivisti te saku wey mibpuasa he tuus te ed-engkezan dan en is mezaat he menge ulaula zan. ⁶ Ne hein netudtulan is hadi dan dutun te inged, ne mid-awè sikandin diyà te pinuuwè din te kedhadì. In-awè din is sampun din te kedhadì, ne mibivisti sikandin te saku wey ziyà sikandin mebpinuu te avu. ⁷ Ne midhimu zutun te hadi is sugù he edhenduen te, “Iyan sugù te hadi wey te menge upisyal zin is: Kinahanglan he kenè dèpa megkaan wey med-inum is minsan hentei he nesakup dutun te ginhedian, wey kenè daan dèpa ibpekaan wey ibpeinum is langun he menge vaka, kerehidu, etawa kambing. ⁸ Is langun kinahanglan he mebivisti te saku, wey kinahanglan daan he ebelhenan te saku is menge uyagen. Kinahanglan he med-ampù diyà te Megbevayà is uman sevaha te ked-ampù he utew hustu. Ne kinahanglan daan he engkezi te uman sevaha is mezaat he menge ulaula wey kebpsendaagdaag. ⁹ Su kela ke maawè ded is pauk te Megbevayà kenitew. Kela ke meilisi zed is pauk din te hizu ne kenè kiw zed egkenegerà.”

¹⁰ Ne hein naahà te Megbevayà is mid-ulaula zan he iyan is ked-engkezi zan te mezaat he menge ulaula, nehizuwan din sikandan ne wazè din sikandan leusi te edlimas.

**Nepauk si Jonas Tenged te Kegkehizuwi te
NENGAZEN te menge Tig-Nineve**

4 ¹Piru wazà mesuat si Jonas, kekenà, utew sikandin neepes. ²Ne mid-ampù sikandin diyà te NENGAZEN he ke sikandin te, “NENGAZEN, heini is kebpeseyluwa nu te menge tig-Nineve, ne zaan ku en he netueni zutun te aney he kedsugua nu kedì, umbe migaanggaan a mebpelaguy pehendiyà te Tarshish. Su netuenan ku he veligegawen ka wey hihizuwen he Megbevayà. Ne mepelevayen wey nepenù te hizu wey andam he kenà edlaus edsilut te menge etew he ed-iniyug te mezaat. ³Ne guntaan, deyzey ke edhimetayan ad kenikew, su meupiya pa ke ebpatay a kenà te uuyag a.” ⁴Ne midtavak is NENGAZEN. Ke sikandin te, “Kenè ka engayan he egkepauk tenged kayi te mid-ulaula ku.”

⁵Ne zutun midhipanew si Jonas pehendiyà te zapit te edsilaan dutun te inged he Nineve. Ne hein nekeuma zutun, midlelawig sikandin, ne zutun sikandin mebpimpinuu is edhelung. Su ebpesesegazen din ke hengkey is egkeulaula zutun te inged. ⁶Ne mibpengelinteuwan te NENGAZEN he Megbevayà, he medtuvù dutun te uvey ni Jonas is tevayag he segugunà ebpenguyabpat su wey melembungi si Jonas. Ne haazà neketavang ki Jonas ne utew sikandin nelipey. ⁷Iyan, te egkeriwaswas dutun te sunud he andew, duen tetaru he impeketket te NENGAZEN dutun te tevayag su wey megangu haazà.

⁸Ne hein midsilè en is andew ne impepengeramag te NENGAZEN te meinit he keramag he ebpuun te edsilaan. Ne midluyahan si Jonas tenged te keinit te andew. Ne egkesuat en sikandin he ebpatay, ne ke sikandin te, “Meupiya pa ke ebpatay ad kenà te uuyag a.” ⁹Iyan, migkagi is Megbevayà diyà te ki Jonas te, “Dait be he igkepauk nu is kekkegangu kenian te tevayag?” Ne midtavak si Jonas te, “Uya, dait iyan he egkepauk a. Umbe meupiya pa ke ebpatay ad nasi.” ¹⁰Ne migkagi is NENGAZEN te, “Heeyan is tevayag he midtuvù wey nenguyabpat seled te sengekezukileman dà, ne negangu te kekkegunud he andew ne wazà kenikew he vaal zutun, kenè ka iyan mibpetuvù duen, iyan, minsan pa zutun egkenugunan nu gihapun. ¹¹Ne iyan e pa kenà mehizu te Nineve, kenian te inged he zuen duen subra he 120,000 he menge etew he wazè dan hanew zuen te kesuguan ku, ne zuen pa mahabet he menge uyagen?”